

>> BERITA > NASIONAL > Agensi kerajaan kini lebih bersedia hadapi gelombang kedua banjir

Agensi kerajaan kini lebih bersedia hadapi gelombang kedua banjir

|| 30 Disember 2021



Ketua Setiausaha Negara Tan Sri Mohd Zuki Ali melihat skrin sistem ramalan dan amaran banjir pada Lawatan Kerja Ketua Setiausaha Negara dan Ketua Setiausaha Kementerian Alam Sekitar dan Air ke Pusat Ramalan dan Amaran Banjir Negara (PRABN) di Jabatan Pengairan dan Saliran Malaysia, Jalan Ampang hari ini. - Foto Bernama

KUALA LUMPUR - Ketua Setiausaha Negara, Tan Sri Mohd Zuki Ali berkata, agensi-agensi kerajaan yang ditugaskan untuk menghadapi gelombang kedua banjir seperti ramalan Jabatan Meteorologi Malaysia (MetMalaysia) didapati kini lebih bersedia dan bertindak pantas dalam menjalankan tugas masing-masing.

Beliau berkata, dalam menghadapi gelombang kedua ini, agensi-agensi seperti Polis Diraja Malaysia (PDRM), Angkatan Tentera Malaysia (ATM) dan Jabatan Bomba dan Penyelamat Malaysia (JBPM) bergerak dengan lebih cepat setelah 'belajar' daripada pengalaman menghadapi gelombang pertama sebelum ini.

"Agensi-agensi yang ditugaskan untuk menghadapi bencana memang sudah bersiap sedia. Umpamanya hari ini, bila banjir berlaku di Jeli pagi ini, pihak ATM, PDRM dan JBPM telah berada di tempat kejadian," katanya selepas melawat Pusat Ramalan dan Amaran Banjir Negara (PRABN) pada Khamis.

Sementara itu, Ketua Setiausaha Kementerian Alam Sekitar dan Air (KASA), Datuk Seri Dr Zaini Ujang berkata, PRABN yang mempunyai 1,100 stesen sistem penggera banjir mampu memberi ramalan banjir tujuh hari sebelum dan amaran banjir dua hari sebelum dengan ketepatan yang hampir.

"Contohnya di Sungai Kelantan ada 20 sistem penggera siap dengan kamera. Jadi kita boleh tahu di mana air akan bottleneck (melalui cerutan) dan melimpah di mana," katanya.

Zaini berkata, PRABN yang meliputi 41 lembangan sungai dan dibangunkan dalam tiga fasa dengan fasa pertama melibatkan sungai di negeri Pahang, Kelantan dan Terengganu yang dijangka siap sepenuhnya dua tahun lagi.

PRABN fasa dua di 38 lembangan sungai seluruh negara pula dijangka siap pada tahun 2025 dan fasa tiga di 22 lembangan sungai di Sabah dan Sarawak dirancang bermula pada 2026.

Sementara itu Zaini berkata, PRABN di pantai barat dan Lembah Klang pula dijangka beroperasi pada tahun hadapan.

PRABN akan memberi tempoh masa yang mencukupi untuk penduduk dan agensi bertanggungjawab bertindak awal sekali gus mengurangkan kerugian harta benda awam sehingga 30 peratus setahun. - Bernama

